

Cu asistencia masal:

ACTO DI CONDOLENCIA Y MISA SOLEMNE TABATA SUMAMENTE CONMOVEDOR



ORANJESTAD (AAN) -- Un multitud enorme a presenta ayera atardi na Misa Sagrado Curazon di Hesus, pa duna palabranan di condolencia na e famianan di Hubert, Lourdes y Leandro Thiel; Henrich y Sebastiana Leito; y Sigfried Stede, y duna e restonan mortal di e Arubianonan aki un ultimo adios.

Funcionarionan di Aeropuerto tabata tey for di tempran, mescos cu coordinadornan di ministro, Parlamentarionan, y coleganan di trabao di e personanan cu a fayece tabata presente. Asina por a mira gruponan uniforme, e.o., personal di Huis Maristella cargando diferente krans, y pilotonan di Avia Air. Gobernador Olindo Koolman hunto cu su señora tabata presente, y poco rato despues por a mira yegada di nos ministronan.

E acto di condolencia mes tabata hopi conmovedor. Un rij grandi di pariente, coleganan di trabao, amistad,

conociman y di pueblo en general a haci acto di presencia pa solidariza nan mes cu mayor, ruman, y otro famianan mas cercano di e fayecidonan. Prensa di Aruba tambe tabata solidario cu e famianan den e momentonan duro aki.

Por a ripara cu riba cada caha mortuario tabata tin e potret respectivo di e fayecido, y nan famianan tabata para banda di e caha y den e rij di asiento dilanti cada caha.

Aunque e famianan a trata di keda lo mas sereno posible, na dado momento esey no tabata por mas, y por a tende palabranan di lamento di un of otro mayor, kende a pasa momentonan mas fuerte kizas di loke nan forza humano por a soporta.

Na momentonan cu un voz a lanta pa canta e Ave Maria, lagrimanan a yena wowo di hopi hende cu tabata wardando pafu prome cu Santo Sacrificio di Misa cuminsa. E Santo Sacrificio di Misa

Solemn a worde celebra pa Monseñor Willem Ellis, cu asistencia di Pastor Bouwman, Pastor Juancho di Savaneta, y otro sacerdotenan.

E oracion di apertura tabata hopi significativo, cual ta bisa: "Señor, nos ta yora nos rumannan; nan morto repentino ta haci nos tristeza doble mas grandi. Ta cay nos duro pa sigui biba sin nan. Laga Bo amor duna nos e gracia di por kere loke nos mes no ta caba di comprende; esta, cu Bo a yama nan pa biba cerca Bo den tur siglo di siglonan".

No tin palabra pa describi con impresionante y conmovedor e Santo Sacrificio di Eucaristia tabata, unda cu un fila largo di persona a ricibi Santo Hostia.

Despues di e rito di comunion a sigui pa palabranan di representante di gobierno y famianan, pa finalmente haci un oracion comun, reza oracion di despedida final, sigui pa e acto di bendicion door di

Riba e potret aki por mira compañeronan di school di Leandro Thiel, sinta den misa hunto ayera durante e servicio di misa pa descanso di alma di nan amigito, su mayornan y otronan cu a perde nan bida den e desgracia di avion diaranzon ultimo.

Monseñor Ellis y e pastornan cu asistie durante e magno celebracion di misa aki.

Un biaha mas DIARIO ta manda palabranan di condolencia na e famianan di e fayecidonan, y cu Dios duna

nan hopi forza pa acepta su designio, y cu e recuerdonan mas bunita cu nan por tin ora nan seman keru tabata na bida lo prevalece riba e momentonan doloroso y duro cu e tragedia aereo a causa.